

■ CORS DI FURLAN *Consegnâts i atestâts*

Si son sierâts i cors di lenghe furlane pai dipendents de publiche aministrazion, organizâts dal Centri interdipartimentâl di ricercje su la culture e la lenghe dal Friûl (Cirf) de Universitât di Udin. La consegne dai atestâts si è davuelzude te sale dal Consei di Palaç Florio. La cerimonie e à metût adun, pe prime volte, ducj i 41 corsiscj dal Ateneu, de Provincie di Udin e dai altris ents locâi (Regjon e comuns de provincie), che a àn superât la prove finâl. A dâju il bon acet a jerin il retôr Cristiana Compagno, il president de Provincie di Udin Pietro Fontanini e il diretôr dal Cirf Piera Rizzolatti. Tai ultins trê agns la Universitât di Udin e à organizât in dut 29 cors di lenghe furlane par passe 350 partecipants no dome a Udin, ma ancje a Pordenon e Gurize. «La Universitât dal Friûl – al à marcât il retôr Compagno – e conferme il so impegn sul front de lenghe e culture furlane, par mieç dai imprescj formatîfs che o cirarìn di infuartî in colaborazion cui atôrs dal teritori». Pal president de Provincie di Udin, Pietro Fontanini, «pai dipendents publics, in particolâr, vè podût infondi la cognossince de marilenghe al pues jessi une maniere di stâ plui dongje dal citadin». «Dal 2007 – e à marcât Piera Rizzolatti – o vin podût vierzi lis iscrizions dai cors di formazion, finanziâts cui fonts de leç 482/99 che a rivuardin la formazion in lenghe furlane e organizâts dal Ateneu, no dome al personâl de universitât, ma ancje a cui che al lavore in altris ents publics, cun di plui dai citadins e students interessâts ae materie e intervignûts tant che uditôrs». In particolâr, tal 2009 a Udin il Cirf al à organizât cuatri cors, doi di nivel base e doi di nivel intermedi, risiervâts ai dipendents de Provincie di Udin e dal Ateneu. Cun di plui, a son stâts organizâts doi cors di formazion pai dipendents de Provincie di Gurize e des aministrazions dal teritori gurizan e la seconde edizion dal cors «Comunicâ in lenghe furlane», destinâts ai dipendents des publichis aministrazions, ai gjornaliscj e ai adets aes comunicazions. L'obietîf al è chel di «divilupâ simpri cognossincis e competencis linguisticis – e à sierât Rizzolatti – pal davuelziment di ativitâts lavorativis in marilenghe te publiche aministrazion, cul favorî l'aprendiment di un lengaç setoriâl tecnic aministratîf che al faciliti la comunicazion cui utents e al aplichi lis normis previodudis su lis minorancis linguisticis e tal teritori».